

UVOD

Europska unija je zajednica 27 država Europe, koja je utemeljena na zajedničkim interesima, institucijama i pravnim aktima država članica, kroz jedinstvenu valutu, zajedničku obrambenu politiku te saradnju u svim oblastima života i rada, a sve je to obezbjeđeno Ugovorom o Evropskoj uniji i drugim propisima Unije.

Uticaj Evropske unije na svjetska ekonomska, politička i sva druga pitanja svakim danom je sve veći. Proces integracija, uvođenje eura i progresivan razvoj zajedničke vanjske i sigurnosne politike daju Evropskoj uniji politički i diplomatski status koji odgovara njenoj nesumnjivoj i prvorazrednoj ekonomskoj moći.

Unija pored ekonomskih i trgovinskih ima i čitav niz strateških vanjskopolitičkih ciljeva, prije svega uspostavljanje stabilne Europe čiji će glas u svijetu imati sve veću težinu. Proširenje Unije je jedan od ciljeva koji treba pomoći da se to ostvari, formiranjem unutrašnjeg tržišta sa više od 480 miliona potrošača i okončanjem viševjekovne podjele Europe, posebno nakon drugog svjetskog rata.

Europska unija je, kao najveći trgovinski partner u svijetu, odlučna da obezbjeđi svoju konkurentnost na međunarodnom nivou i da istovremeno unaprijedi globalnu razmjernost kroz dalju liberalizaciju pravila trgovine u svijetu. Ovaj proces će, po uvjerenju zemalja članica Unije, koristiti zemljama svijeta, a prije svega zemljama u razvoju.

Vanjske aktivnosti Unije čine tri osnovne komponente, a to su: trgovinska i ekonomska politika, pomoć u razvoju i politička dimenzija. Ta tri segmenta daju Uniji značajne instrumente za vođenje razložne svjetske vanjske politike u diplomatskoj, ekonomskoj, trgovinskoj, tehnološkoj, naučnoj i drugim sferama i oblastima života.

Za razliku od drugih tradicionalnih međunarodnih organizacija Europska unija ima jedinstvenu institucionalnu strukturu. Zemlje koje su prihvatile europske ugovore potvrdile su svoju spremnost da dio svojih suverenih prava ustupe neovisnim institucijama koje istodobno predstavljaju nacionalne interese, kao i interese Unije. Te institucije međusobno su povezane odnosima komplementarnosti temeljem kojih se donose odluke.